

COSMOGLOTTA

**Organ mensual del Association International Cosmoglotta
Consacrat al developation, propaganda e application del
Lingue International Auxiliari Occidental**

Redaction e Administration: COSMOGLOTTA, Mauer bei Wien, Austria.
Abonnement annual: 7 ö. S = 1 doll. = 5,2 sv. fr = 4,2 RM = 33 čsl. K

Annu VII

Mai 1928

Nr. 48 (5)

Contene: Futur evolution natural in li L. I., de E. de Wahl, pg. 69. - Pedagogic valore de Occidental (Continuation e fine), de Dr. phil. K. Schüppel, pg. 73. - Finale del adjectives, de A. Z. Ramstedt, pg. 76. - Chronica, pg. 78. - Notices, pg. 82. - Altri „Mundlingues“, de E. W., pg. 83. - Occidental-Servicie, pg. 84.

Futur evolution natural in li L. I.

Mult interlinguistes hant pensat atin'et li final form del L. I., a quel illi ha consacrat su labor, sempre denove fa li experientie, que illi deve forjettar li amat antiqui form por un tut novi. Li max multes mem ne posse far ti sacrificie e abandona totalmen li movement. Apartmen drastic ti situation esset pos li ruina del Volapük, u del 10-20.000 volapükistes, ne plu quam forsan 100 restat fidel al idé in su novi form. Li salta de Volapük a Esperanto o Neutral esset tro grand e inacustomat. Ma plu adavan, li saltas deveni minu grand, poc a poc it es solmen passus, e in fin presc ne es plu remarcabil.

Ma li publica ne resona talmen. E por exemple nu che ruina de Ido quelc mem eminent idistes desillusionat de Ido, támen ne posse far li passu ad Occidental, sive que illi ja es tro intoxicat per li innatural formes de Ido, sive illi desfide, esque nu vermen Occidental es li final form del L. I., do quant vezes illi deve ancor changear li systema!

To es un totalmen comprensibil psychologie. Ma plu li lingue deveni minu artificial, minu arbitrari, plu stabil it deveni e tam minu coses va esser changeat in it. Ma variar e mutar se it va naturalmen, sam quam omni natural lingues nequande resta invariabil ma evolue constantmen. Solmen li mutationes es gradual e in normal témpores presc ne remarcabil. Ma in turbulent periodes apportant grand social mutationes anc li

lingues natural comensa mutar se in plu rapid tempo. Noi omnes ha experit li quasi catastrofal changes, a queles esset submisset nor matrin lingues. Nov paroles sovente artificial havent origine in contractiones ex pluri paroles, p. ex. tcheka, Schupo, tut nov senses de ja existent usat in un nov maniere, p. ex. poilu, sanction, ha invadet nor lingues, nov manieres de expression etc. etc. Specialmen grand ti changes esset in Russia e Germania, u li structura del vive ha cardinalmen changeat se. Ma anc li lingue del boulevardes de Paris ha talmen deviat del antean, que ne essent Parisan, it es presc impossibil leer un modern nouvelle frances, proque on ne comprende plu li nov parol o parallel sense del parol o mem del tot frase.

Do anc li L. I. va changear, e anc Occidental ne es li final form de un L. I., proque null lingue, solmen un mort quam latin, posse haver un final form. Ma por nos, qui nu vole fundar-se sur Occidental e propagar it, it es necessari saver, quel mutationes va esser possibil in li lingue durant su natural evolution.

Ci mi deve far differentie inter 1) involuntari instinctiv changes a queles omni vivent lingues es submisset, e 2) voluntari introductet conscientiosmen quam visibil ameliorationes o por escartar sentit mancas. Li unésim specie nequi time, ma just li duésim, nam til nu li mutationes in li lingues international ha esset precipue fat in ti maniere. E támen li unésim va luder in Occidental un mult plu grand e decisiv role quam li duésim.

Li forsan max visibil e expectabil es li ortografic reforma. E on vole far it ja nu, parlante pri necessitá del tal nominat fonetic ortografie. Mi ja tant vezes ha explicat li absurditá in se self de un tal postulation, que mi ci ne va ancor un vez parlar pri it. Ma mi concede que in futur it va venir e it es tande, quande li L. I. va esser parlat partú quam duésim natural lingue, quel li infantes ja audi partú apu su propri lingue, in li strad, in li scol, forsan che mult visitatores, proque li trafic e communication specialmen per aviatica e radio va devenir un absolut altri quam on nu mem posse imaginar. It es, un reforma ortografic va evenir tande, quande li lingue ne va esser aprendet quam extran, ma quam un del lingues quotidian, o quam in landes bilingual (con du lingues) u chascun ja del infantie parla ambi lingues. Tande li etymologic coherentie sive va esser sentit instinctivmen, sive ne esser sentit, ma li lingue parlat quam propri. E ti reform ortografic-fonetic va esser sentit necessari ne ante quam

un tal va esser fat che li grand nationes. Nam si on es customat scrit li commun international paroles in egal maniere che li majorité del usantes, e to es li quar grand nationes AFDS, tande on ne senti li necessitá haver un altri ortografie in li lingue international. Ma, mi concede, un die it va venir, proque ja nu li nationalistic tendenties in li singul popules sembla voler desproximar li lingues de Europa. On posse dir que hodie it es li ultim momente trovar ancor alquicos commun e general in li europian lingues, tam long quam existe homes queles ha studiat latin, frances, angles e usa li paroles del alt spiritual cultura. Quande li Nurmi-cultura va superar li altri scientic (e nor junité tendentia a it) tande introducter un commun L. I. va devenir sam impossibil quam un tal inter frances e japanes, e tande un L. I. va posser esser solmen ti del max potent, do probabilmen li lingue anglesi.

Do li reform ortografic va venir self si li extern conditiones va esser favorabil, i. e. si li L. I. es ja parlat partú quam lingue vivent, e do havent su propri fonetica e si li transcription de ti fonetica ha evocat un nov metode che li principal popules.

Ultra ti change on va dever prender in calcul li change evocat per necessari acurtation del parla, evocat del tempo e rythme del modern vive, specialmen remarcabil in li ortografies frances e angles u mult litteres ha devenit mut. Do on va posser expectar un abolition del final vocales e approximation in ti relation al angles e german. Ja pro ti rason li differentiation grammatical, reservat al final vocales in Esperanto es un medie antiprogressiv, impediend li evolution natural in li direction de plu rapid parlada.

Do in fine noi posse expectar un evolution del Occidental ad un form simil a «etem» de Yushmánov, modelos de quel on posse leer in li jurnal Kosmoglott. Probabilmen ti form va esser atin'et al sam témpore con li ortografic reform. Ma hodie ti statu, quasi chinesi, por nos europianes ancor ne es usabil. Adplu it postula un absolut syntactic stabilisation del órdine del paroles, do quelc special expedient por li modulation del sense, forsan quelc special intonation, o altri medie, hodie ancor ne imaginabil. Ma just pro to un tal evolution ne posse esser fat ja nu, proque in li hodial statu li lingue vell esser tro incliar e imprecis, quam on posse vider, leente li textes de sr Yushmánov in Kosmoglott.

Ultra to in li témpore de introduction de un L. I. quel ancor es un lingue extran, on deve afacilar ti introduction conser-

vante quant possibil un clar grammatic-etymologic structura. Just pro to tam bon projectes quam ti de Lott e Dr. Molenaar ne posset obtener success, e in contra just pro lor cristallin grammatic structura ha expandet se tam admirabilmen Volapük e Esperanto. Queles nu posse esser ancor li voluntari-arbitrari changes in Occidental? In li suffixes to ja es impossibil proque lor signification ja es stabilisat in li usu international. Do li sol dominia va esser li compensation de til nu usat paroles per altris, do un process quel existe anc in chascun lingue vivent, in introduction de nov synonymic differenties, e elimination de inutil tales. Probabilmen on va anc stabilisar li nu un poc fluctuant form e ortografie del paroles (p. ex. ca orthographie o ortografie etc, ca thesis, these o tese, ca aplicar o aplicar) ma forsan to va esser impossibil, li tēmpore va monstrar. Quancam p. ex. on have li obligatori accusative in Espo, ma quant porsones usa it regularimen? Li «Arbeiter Esperantist» consacra 6 págines por explicar a su letores (laboreros german) li rect usation del accusative.

Do in general on va dever esser plu tolerant in un L. I quam in un national, ja proque on ne have li medies exercir un dictatura lingual, quande it deveni proprietá de omni popules. E li academie futur, ancor plu quam ti de Francia va dever esser caut. ne per prescrib qualmen on deve parlar, ma registrante e expandente per radio etc li bon formes e paroles usat e introductet. E specialmen in ti relation on posse expectar un grand inrichament del lingue per nov paroles oriental venient per se self che plu intim connexe del Occidente con li antiqui oriental culturas indic e ost-asiatic. Ja li superficial conossentie ha dat nos nov conceptiones quam karma, sansara, nirvana, tao, bushido etc.

Ma omni tal gradual micri changes absolutmen ne impedi li comprension e in general on posse dir que in li form de Occidental li L. I. nu ha finalmen trovat si ne un form final, quel es impossibil, quam mi ha monstrat, ma un form absolut stabil, proque basat sur li fundamente del commun europian sentimente cultural. Va persister oscillationes ma ne plu saltas!

E. de Wahl.

Li grandore del dangere misura se per li absurditá del via por escapar.

Paul Mongré.

In li teatre del vive existe mult vermen tre mal plazzes. Ma li piece ludet es bon.

Paul Mongré.

Pedagogic valore de Occidental.

(Continuation e fine.)

Li mund-lingue posse luder un rol in li geographic instruction, apartmen in scoles ne-romanice. Quant mult nómnes propri posse eclerar l'instructor e talmen crear sovente un intern vivent coherentie inter li object e un parol sin carne e sangue. To excita l'interesse infantin e affacila li inpression del memorativ materiale.

Quelc arbitrarimen selectet exemples mey exposir lu dit. Li Cap (promontorie) Tribulation in Australia dá nos un convenient occasion racontar li accident del capitan Cook, surprisant li audaciosi navigator durant su mund-viagie, quande il seglat along ti desert-coste. Li nómne Agulhas clarmen indica li exteriori form del max sudi punctu de Africa quam it presentat-se al portugalesi descobritores.

Li insules de Cap Verde e li Sunda-insul Flores fa divinar un poc pri li paradisiac clima. Li Sunda-insul Timor ha fixat li unesim traviventie quel hat ta li descobritores. Li traduction de Rhodesia resulta «land de Rhodes», li famosi anglesi rey de diamantes (cp. anc Pretoria, Columbia). In America li fantasie del scoleros es apartmen vivaci animat. Lor spiritual ocul vide li Rocky Mountains, inspirant terrore e samtemporalmen majestosi sublimità. Li tal-nominat nave-sepultoria Sable Island memoria nos pri li indescribil tormentes de sitie del infelici naufragiastes. Vera Cruz, San Salvador prova distinctmen qual important parte havet li catholic ecclesie in li unesim aventurosi expeditiones del hispan «conquistadores».

Li simplic nómnes: Costa Rica, Valparaiso, Buenos Aires, Montevideo, Selvas, raconta plu quam un bon-stylisat discours del instructor pri li geographie de Sud-America posse dar.

Ma per ti ci expositiones noi ja inintentet e involuntarimen transglissa in li region del etymologie. Per su etymologic structura Occ factli sta plu alt quam omni antean auxiliari lingues international e fa it un instrument de unic educativ valore.

Noi possede un cert quantità de paroles ye queles inhere tant mult historic contenida que li sentiment de pietà contra nor ancestres despermisse nos mutar e translater les sin pesant motives. Ili deve restar sacrosant anc in li mundolingue. In ultra lor exterior form ne deve esser transformat pro li ety-

mologic transparentie. Quelvez mem li ultim es retuchandi ú it ha pallet.

Qual abundantie de idées apparí avan nor ànime che li patinat paroles: «imperator» o «tribun». Li expression: «renascentie» dí que li antica ne morit pos li perition del «imperium romanum». Li long serie del religios paroles p. e. Vulgata, Excommunication, Transsubstantiation, Reformation, Predestination, Puritanisme, Concordat, Ultramontan monstra li firm connexe del europian historie con li religion de Christus, quam educator a homanité. In li epoca quel porta li etikette: «Absolutisme, Mercantilisme» es plantat li seme por li ultim du seculs. Li brillant tri-astre: «Libertà, Egalità, Fraternità» prelude li nov-epoca e es circumvestit per un tam solemni nimbe por omni democrat, quam li paroles: «proletariatu, expropriar» es por li socialist.

Ex li region del arte noi cita: Pietà (Michel Angelo), La Bella (Tizian), Melancholia (Dürer), (H)Eroica, Missa solemni(s), Appassionata (Beethoven), Undine (Lortzing).

Nor Occ subtene li signification del finitiones «-o» e «-a» por marcar li sexu in mult prenomines p. e. Clara, Anna, Mario, Antonio, Portia (Shakespeare), Hugo, Cuno. Li disciples es astonat audiente que li parol »Martin« gusta alquant ye guerre malgré Sant Martin e Martin Luther e que Christian significa nullcos altri quam «alcun qui appartene a su Salvator Jesu Christo».

Li grammatical terminologie es specific occidental e comun a omni popules europian. Noi vole esser mersiosi que noi ne plu besona offertar al scoleros indigestibil parol-materiale, ma posse interpretar e regularmen derivar les tal mysteriosi e esoteric terminos quam p. e. nominativ, genitiv, singular, activ, substantiv, preposition, casu(s), plusquamperfect, possessiv etc. Sammen noi procede in li mathematica concernente paroles quam: multiplicar, divisor, ordinate, minuend, differential-calculada. In li instruction de physica e chemie es valorosi li secuent etymos: static, calorie, reflector, potential, affinità, valentie.

Ma lass nos tutmen abstraer del singul apprensiv disciplines e solmen prender in calcul li general profit. Tande omni justmen judiciant hom va aconosser li incontestabil facte, que li myriades de extran paroles per Occ deveni li spiritual proprietà del apprendentes. Li magic baston de nor lingue insofla novi vive in tal conosset expressiones quam: spin-at, lapid-ar.

inter-esse, sold-at, rehabil-it-ar, gran-at, gran-it, firma, mor-al, in-sinu-ar, loco-mot-iv-e, con-dol-ent-ie, tri-vi-al, fil-i-gran, macul-at-ur, blocc-ade.

Altri paroles quels per long circulation esset desfaciat e pallet quasi quam antiqui monetes, es denov usat pos purification e politura. On mey REGARDAR p. e. inviar (F. envoyer), simplic (F. simple), inbarcar (to embark), inamico (A. enemy).

Un ulterior exemple mey prubar que l'instructor posse demonstrar linguistic leyes. Li mutation de parol-signification tam domina li mund-lingue Occ, quam li organicmen crescet lingues national; nam Occ solmen forma li natural elongation e continuation del alt-europen idiomas.

Li nascentie del articul strax fat possibil li substantivation de mult primitiv adjectives. Li psychologo vell dir que li objectes esset caracterisat secun un frappant qualità. On posse excellentmen observar to in Occ p. e. gener-al e li general, sammen bocc-al, sign-al, pais-an, missiv(e), apparat, intendant.

Un altri specie de significativ mutation incontra nos p. e. in «direction», u on constata li extension del action al persones, al concretisation. In «registratur» e «commandantur» li signification del resultat change-se in li loc, u li concernent action evente.

Un altri linguistic phenomen es li «assimilation» quel basa sur li physiologie de nor organes de articulation. Anc ci Occ livera tre instructiv materiale p. e. con-responder: corresponder, in-luminar: illuminar, ex-fortiar: effortiar, ob-posir: opposir, ad-cessibil: accessibil, ad-fini: affini.

Ti ci allusiones e directives pri un eventual scientific exploitation de Occ per un habil instructor mey sufficer tant plu que tal docentie es solmen effectuabil in medial scoles.

Ye li fine li idé veni in nor mente que hodie on audi li plende del làtere del filologos que li instruction del latin in li curs del tēmpore es condemnat al morte. Mi crede que ti ci timore nequalmen es injustificat, ma it vell esser un inpardonabil erra conjecter que it totmen desaparir. Li necessità conservar to quo es ancor effectiv del antiquità, fortia nos serchar pri un equivalent compensa e noi trova it in Occ.

Per it li «eterni Roma» quam un ayunat splendid avie Phoenix denove leva-se ex li cindre por superviver nor epoca «in multos annos».

Dr. phil. K. Schüppel.

Veritās es mult plu criticat quam menties.

O. W.

Finale del adjectives.

In Esperanto e su imitationes on trova obligatori finales por li parol-classes, talmen que p. ex. omni adjectives deve finir per -a. On ha volet regardar ti arbitrari prescrite quam alquo excellent e meritosi, e attaccat per critica, on ha penat defender ti finale quam alquo natural e international. Forsan it pro to have su interesse investigar, qualmen sta li affere.

Unesimli noi constata, que li lingues de Europa ne conosse obligatori special signes por cert parol-classes, p. ex. substantives e adjectives. Li lingue latin, quel reflecte li original statu conosse formalmen solmen «nomina», e on posse distin'er un parol quam adjective solmen secun su syntactic position. Si in modern lingues adjectives sta quam substantives, ili receive articul: «tu es impertinent» (adj.), «tu es un impertinent» (subst.), o li signe de plurale: «li riches e li povres» (subst.), A. «the black people» (adj.), ma «the blacks» (subst.).

Si noi trova un vocal in li fine del adjective ti posse esser: 1) un thematic vocale, 2) un finale de flexion o 3) un suffix.

Quo concerne li thematic vocales on deve observar, que ili ne es specific adjectivie, ma trova se anc che li substantives. Si noi prende li latin parol «bona», li finale -a ne posse esser regardat quam li formal characteristicum por li adjectives. Li sam -a noi trova p. ex. in li substantive «mensa». It indica solmen, que ambi paroles have -a quam thematic vocal por li flexion. Esque ili es adjectives o substantives es possibil saver solmen de lor signification o syntactic position. Proque li a-temas es regularimen feminin, ne solmen in li latin e romanic lingues, ma originalmen in omni aric lingues, ti a ha esset comprehendet pertu quam formal characteristicum por li feminines. Li corelate es o, quel pro to ha ricevet masculin sense. Li o- e a-temas trova se quam fratres e sestras, talmen que a bono corresponde bona, a deo — dea, lupo — lupa, etc. Si alqui vell referer a ti thematic vocale a quam li natural finale por li adjectives, un altri hom vell con li sam jure postular o. Ma ni -o ni -a es in alcun lingue signes por classes de paroles.

Ma inter nominal temas noi trova in li aric lingues un grand nùmere de temas finient per -i, queles es neutral pri lor gramatic gènere. It es remarcabil, que noi trova inter ili un grand nùmere de adjectives, ne solmen primari ma anc derivat: omni-s, svavi-s, brevi-s, amabili-s, amanti-s, etc. In li latin

omni adjectives finient per li suffixes -aci, -bili, -ili, -ali, -ari -ensi, -ori, -nti, etc. esset i-temas, e quo es gravissim por nos, un masse de ili es international paroles. Ti -i es ancor plu o minu visibil in li international paroles, specialmen in abstract substantives, derivat de ti i-temas: F speciali-té, A brevi-ty, D Quali-tät, etc. Un grav factor es to, que anc li o- e a-temas ha viceat su propri thematic vocales per i ante li sam suffixes: ples comparar grec neo-tés, ma latin novi-tas, malgré novo, nova. Noi have uniformitá de un form, quo da nos li adjective uniformi. Noi have adplu clari-ficar, veri-ficar, etc. monstrant quam victorios ha esset li micri i. Esque to ne es quasi un indica de fingre del historie? Li analogie ha ludet su rol, ma anc li hesita del lingue inter novotas o novatas.

Si secun ti regul du i:s vell star ante li suffix -tá, li duesim -i es changeat a -e: varie-tá, proprie-tá, pie-tá, etc. e noi per to receive un gruppe de international adjectives finient per -e: varie, proprie, pie, etc.

Si noi tracta li finales de flexion, noi vide un multicolori carte de different finales. Ma proque noi opine, que un flexion del adjectives in li international lingue ni es conform al stadie de evolution del progresset europen lingues e ni posse esser justificat pro teoretic considerationes, noi ne posse attribuer importantie a flexional vocales. Ma proque on ha referet al finale -a del adjectives in li svedi lingue, in defense del finale -a de Esperanto, noi deve dir, que li -a in p. ex.: den goda mannen = li bon mann, indica solmen li definit forme pro congruentie con li definit forme del substantive, quo es visibil de: en god man = un bon mann, ú ti finale -a ne trova se. On ne deve prender un element de un parol e attribuer a it un arbitrari rol, sin har controllat li ver function de ti finale.

Si noi torna nor attention al suffixes, noi es frappat per li abundantie de i quam vocale in li adjectivic suffixes, ú it sembla har esset victoriant in different lingues e durant different témpores. Noi have per ex. in li latin suffixes quam -ic, -in, -im, -iv, -id, -il, -it, -isc, -bil, etc., in li germanic: -lich, -lig, -ly, -ig, -y, -isch, -ish, etc., in li slavic -ik, -in, -iv, -isk, etc. De special interesse es li suffix L -ic, D -ig., A -y. Desde protoaric tempores ti -ic (originalmen li thematic vocale i c) ha esset translocat a omni temas: L bellicus in vice de bellocus, Gr nymphicos in vice de nymphacos, L unicus ma uno- e slavic inoku, D einig ma Got. ainahs, A stony ma Got. stainahs, etc. Ti suffix, quel in li angles e scandinavic lingues nu es pronun-

ciat solmen -i, es tá tre vivent, productiv: A might — mighty, storm — stormy. Sv mod — modig, D Kraft — kräftig.

Ma anc in li max antiqui lingues aric noi trova i quam adjectivic element formant: comp. latin subst. patre-m e adj. patrius, slavic subst. uchenic e adj. uchenici, etc.

Si noi resumma quo noi mentionat supra, specialmen pri li rol del thematic e suffixal -i, noi deve aconosser, que si alcun vocale ha esset usat, in passat e present tempore, por caracterisar li adjective, ti vocale es -i. E pro to it have li max grand jure por un tal function anc in li lingue international. Ma it es un altri question, in quel extension it deve esser usat. Correctmen it es usat in Occidental solmen pro eufonic motives (omni, altri, aspri) o pro li pronunciation (audaci, mordaci) o pro distin'tion de simil paroles (imperator, imperatori). In altri casus it es omisset.

A. Z. Ramstedt.

Chronica.

In Angers, Francia, Ing. Thibault, director del hydro-distribution, fat li 5esim Marte, in li populari universitate, un discours pri li question del L. I. Pos descrir li evolution tra Volapük, Esperanto e Ido, il monstrat que Occidental es sur li rect via al ideal mundolingue pro que su base ne es artificial, ma li lingues vivent. Li local jurnales raportat pri ti convenida.

In Paris, li 26esim Marte, evenit un controverse pri li L. I. in li individualistic grupp l' en-dehors. On save que E. Armand, director del jurnal del sam nómine, es un fervent amic de nor movement. Il apertet li discussion in tre objectiv maniere. De Guesnet respondet e dit que li L. I. deve abandonar max mult li artificialità por internationalità maximal tam in li vocabularium quam in grammatica e derivation, e explicat proquo il devenit Occidentalist. Papillon, in nómine del idistes critica assertet irregularitàs de Occ, e dit que Ido es sempre perfectibil. Un Esperantist repetit li customat coses: Esperanto es un fact, li unic L. I. etc, e monstrat un absolut incompetentie pri li tot question. Du o tri altri persones prende part in li discussion ù, denove, li publica concludet que Esperanto es un nov religion.

Inter li max recent adhesiones a Occ. noi remarca con ple-sur li old pionero, ex-espist e idist, pensionat director de scole, Félicien Sonnier in Les Abrets, Isère e del jun electric inge-

niero G. Véger, ex-delegat del S. I. F. in Saumur, nu in St. Clément des Levées (Maine et Loire). Noi regreta saver que nor coidealist H. Senigallia, Marseille, ha cessat su mundolinguistic activitá durant plur mensus, pro grav maladie. Il mey accepter nor sinceri augures de reconvalescentie. L. M. de G.

Sr de Guesnet, Occidental Buró, 83 Rue Rochechouart, Paris IX, editet un propagandic foliete in frances con comparativ textus. (Precie 100 exemplares, franco, 5 frances franc in Francia, 6 fr. fr extra Francia.) —x—

Li convenidas semanal del Occidental-Societé Parchim (Germania) es sempre bon visitat. Du discursus in Occidental: 22 februar: Li filosofie de René Descartes, 28 marte: Albrecht Dürer, li pictor e su ovre. — Nor fervent propagandist sr Lübeck labora por nor lingue in li vicin cités. K. S.

Nor colaborator senior Dr Mell, consiliero del guvernia, publicat in nr III/3 del academic jurnal «Mitteilungen der Vereinigung der Freunde des Fridericianums in Rudolstadt», Thüringen (Germania), sub titul «Auf dem Wege zu einer europäischen Hilfssprache» (Sur li via a un europaan lingue auxiliari) un modelic articul propagativ por nor lingue, con textus comparativ in Esperanto e Occidental.

«Le Combat», Flémalle-Grande (Belgia), marte, e «l'en dehors», Orléans (Francia), marte, rapporta pri li frances propaganda-brochure de L. M. de Guesnet «L' Occidental, langue d'intercompréhension immédiate».

«Deutsche Kurzschrift», Duisburg (Germania), marte, recensente PANSCRIT, Occidental adaptation de stenografie Scheithauer, rapporta pri nor lingue.

Jean-Pierre Liausu, sub titul «Cosmoglotta» in «Comaedia», 4 marte, scri pri Occidental, quel il compara al artificial lingues Ido e Esperanto. Su explicationes relantent e pri li rol historic del lingue frances etc, monstra que il visibilmen ne ha leet nor publicationes. E. P.

Profesor Christaller, membre del Esperanto-Academie, prende li parole in li rubrica «Ni kaj la aliaj», nr 9 e 10 de «Heroldo de Esperanto». — Il constata que malgré li grand pretensiones e reclame con quel intrat in concurrentie Ido e anc altri mundlingues, Esperanto marchat tranquilmen su via e sempre crescet, durante que li altris pos quelc témpore morit. Nu anc Ido es morient. (Ma prof. Chr. ne dí pro quo to ha evenit: ne per

se self, ma pro apparition de Occidental). Il cita quelc Idistes queles revenit denov a Esperanto: seniores L. E. Meier, Ed. Wenk a Ward Nichols. Omni tri justifica su retorna a Esperanto per li sempre continuat reformas in Ido. — Il dí que anc li «judas al Zamenhof» ha profetizat li ruina de Esperanto pos 5 annus, ma . . . nu Ido self ha atin'et ti fate. — On posse astonar que sr Chr. pensa que Esperantida de sr de Saussure posse esser apt quam base de reformes in Esperanto, si alcun sufficient potent organisation vell soluer li affere. — Pri to noi dubita fortmen. Un impartial organisation ne-quande va prender Esperantida quam base. — Li duesim parte del articul, in nr 10, es consacrat al critica de Occidental. Ti parte es debil, proque prof. Chr. visibilmen ne conosse li structura de Occidental e solmen ha leet quelc numerós de Cosmoglotta. Por exemple il qualifica li parol «holigan» quam incomprendibil. Nu ti parol, originalmen angles, es conosset mem a omni russ ovrero! Do it have li max grand internationalitá possibil. — Sr. Chr. sublinea li facte que Esperanto ja ha monstrat su aptitá por omni relationes, durante que Occidental to ne ancor ha fat, e pro to il considera it imprudent adopter tal systema ante haver tal certitá. — Si to vell esser rect, li tenentie de prof. Chr. vell esser justificat. Ma li multissim enunciations de conosset scientistes pri li inusabilitá de Esperanto quam lingue de scientie, sta in contradiction a ti assertion. — Il emfasa que quancam Cosmoglotta appari ja li setesim annu, il ne-quande ha audit parlar pri Occidental. To es tre possibil. Til nu on presc ne ha fat propagande in li grand publica ma solmen discusset in cert interlinguistic circules! Tant plu remarcabil es li nu ja atin'et resultate, sin manuales ni lexicos national-Occidental. — In omni casu anc li ton de ti ci articul es tranquil e digni. Noi espera que pos fundamental conossentie del principies de Occidental anc sr prof. Christaller va convicter-se pri su superioritá. J. P.

In «Heroldo de Esperanto», nr 14, in su articul pri li Esperanto-styl Dr. L. Dreher tucha Occidental e scri: «Occidental basa se solmen sur national-lingual pret gigant-lexico plu minu international che . . . universitatanes e professores de lingues . . . Malgré omni-cos ti lingues es por nos un instruction que on ne posse tro ex-relar un lingue . . . del european spiritu.» Pro to il recomenda al Esperantistes li european styl.

Sub titul «UEA kaj ni» «Heroldo de E.» in nr 13 defende se contra inloyalitá, e di que ja ante quelc annus ha evenit trans-

actiones inter eminent representantes de Esperanto e altri projectes. Il cita inter li participantes Dr. E. Privat, Sra. Morris, E. de Wahl, Dr. Auerbach e altris, e regreta que ti transactiones ha ductet a null resultates. Dr. Axel Wästerland.

In «Esperanto» nr 330 Dr. Edmond Privat consilia atin'er que in congresses (ne in Esperantistic ma general) on mey haver Esperanto quam sol lingue de traduction por talmen un poc afacilar li deliberationes. Ye ti occasion il mentiona li experienties fat in li conferentie pri pacific education in Pralia, quel ha causat alquant brue in international circules. Nu, on save tre bon que ti conferentie esset organisat e preparat per li Esperantistes, do esset in grand parte bluff por li invitat neespistes, qui esset in strict minorité! Talmen on posse demonstrar multcos, e forsan li idé far omni traductiones solmen in un lingue, es tre practic. In general it vell esser max practic traducter in li lingue national del land u eveni li congress, nam sempre li majorité del congressantes apartene al habitantes local; o un lingue conosset de omni inhabitantes, p. ex. angles in li dominia britannic, russ in omni antean russian territorias, german in li antean territorias austro-german e altri central Europa e Scandinavia, frances in li sud e west de Europa, hispan in sud-America (anc Brasil) etc. Ma si li congress junte persones de academic professiones, tande li max simplic vell esser traduction in Occidental, quel, quam ha monstrat plurannual usation sin manuale, sin lexico, es immediatmen comprensibil a omni hom de occidental civilisation. J.P.

In li official organ de U. E. A., «Esperanto», editet in Geneva, on remarca in nr 330 denove divers erras contra grammatica, queles on ne posse explicar quam «print» -erras. P. ex. 27 (3) «...Klubo de la duelantoj (Duelling club) kiu ne akceptis membron ne mortiginte homon en duelo». It deve esser «mortigintan», proque ti parol relate al parol «membro» e ne al «Klubo»... pag. 33 (9) «...oni pagis al li 100.000 dolaroju por oleofonto trovighinta en **sia** absolute malzorgita farmo». It deve esser **lia**, proque **sia** relate solmen al subjecte del frase, do ci al parol «oni», quo ya ne es li sense. On vide do, que li metode de Occidental, quel ne postula tal fin differentiation, ne trovat in li central- e occidental-europan lingues, es plu facil e ne causa inutil lingual erras, **queles** trova se ancor nu in li 24-esim annu de edition de ti official jurnal. — Mi deve constatar que printerras mi presc ne ha trovat in ti cuidosimen editet periodic.

In nr 328 de «Esperanto» sr Privat parla pri li idé de Julio Baghy, quel proposi que al die de nascentie de Zamenhof chascun esperantist mey comprar un libre por avansar li cose de Esperanto. In li articul il di: «Mi ha ricevut de quelc de nor max bon autores e editores epistules quel dà a pensar. Un de illi vendi 100 000 libres de aprension e solmen 300 novelas». — To es vermen tre interessant e it illustra max bon li fals via in quel marcha Espo. Do existe tant persones interessat pri li idé de un lingue international. To es vermen un fact extrem injoyant. Ma li effecte final es anihilant por Espo. Do de 100 000 interessat solmen maximum 300 (un parte ya es comprat del antiqui fidel adherentes) pos examination del unésim manuale trova interesse por continuar su studies! Ci es li ver judicie del publica pri Esperanto e ne li official resolutiones in congresses pri acceptation de Espo, proque li suffocant majorité ne conosse Espo e vota solmen por li idé del lingue international. Plu bass in li sam articul noi trova un altri interessant passage. «Quant persones in li actual esperantistic generation lee li admirabil traductiones de Zamenhof?» (supposit es li biblie, ovres de Shakespeare e altri coryféés del litteratura.). To monstra li fals tactica del Espo-movement. Vermen qui va leer coses tam mult traductet quam li supra citat. Chascun sive ja ha leet les sive posse leer les in su propri lingue. Do ili ne have interesse, e li poc original ovres «literari» in Espo es de minor valore. Pro to on ne lee li Espo-ovres. De un làtere manca li actualità e alt standard, e de altri làtere letura sensational, apt por li grand majorité del «Esperanto-popul». To causa li stagnation del productet «litteratur». Ma on ne posse remediar ti statu. Por actual altqualitativ scientific letura manca li sufficient publica, e por li altris manca li autores. Certmen Espo possede pluri fort talentes e stylistes specialmen in li poesie (Deviatnin, Kofman, Baghy, etc) ma ne por ti sferes queles max mult interessa li homes.

E. W.

Noticies.

Rectificationes: Nr 44, pg. 1, lin. 5: ples leer: exvicepresidente vice: expresidente. Nr 47, pg. 54, lin. 14: suppresser li ultim li, lin. 17: leer quam vice guam.

Index 1927, pg. 3: ples leer: Li articul li de: A. Z. Ramstedt vice: E. de Wahl.

Altri „Mundlingues”.

In nr 43 de Cosmoglotta esset curtmen referet pri li systema «Cosman». Noi recive del autor un rectification scrit in Cosman, quel noi reproducte ci con un response del referent sr de Wahl. Forsan li letores va comprender aliquicos in li textu. Noi ne ha posset comprender omnicos. Red.

Cosman? (scrit in Cosman).

Id es necessari ant-vordan a de unrecti presentation, fat in nr 43 of «Cosmoglotta» ob «Cosman». Id sey indulged, qui tar it sta medi inter mai(or)-min(or) arbitrial projectes! Ma, percepey self, leytoros, qua Cosman es sat estandibl e sat European o non! Qui Cosman ha maior central-european e minor sol-westeuropian character, ce non damnaja (scoda) su Europeanita! Mix - vocabuls, som on reproca uns, on find in sam gradu ac in moderni, yam in novromanice lingues. De coexistentse of Asian (Chinesi con super 400 million, Hind con super 200 million) consonantses e comunvocabuls, fa fixer e min vacillant el European vocabuls in si self; ed ulter coll Asiani Europeanita, noi ad-opted coll simpl avantajes, so fa el lingue béller, fluénter e neutráler! Nu alqui rectifat exemples: «bay» (Deut., Engl., Hind) es null are as Occ; che; «hia» (Ch. e Deut) es = ad-sub; «lie» (Ch., Ar. deut: um Willen) = in afere... «mo» es quasi parlati question-signé!; «jen» = homos tu-diali, i mot verly inter-continental. Sam: «bue» (non: bul, qual on scrid) es Ch, D, E, susténet par r (uss) e h (ind); «yet» = Ch E, ac R: ster: aster es H., «ed» D, E; «i» es undefinat articul! Niquan Cosman had i «conjugation of verbe: es», ma unly generali pro exterordinari, poetic e novelisti use. Finly yo protesta conter de liveration of «exemple del lingue» extracant i torso of i novelisti probe-frase. Certym de tre estimat criticanto, quel il self say, ha criticad i poc superficial, vey manque of studiade del tro concis Cosman-brochure. Ma just veyque Occidental ed Cosman es non lontan dil cil, li muss in reciproc tolerantse per-finan si self e progressan in mundanité e neutralité, anc scode for de aprend-facilitá e bellité ja atinat! K. Milner.

Response: Sr M. nega que existe arbitrari «mix-vocabuls»: nu, un de ili es citat in nor referate: «ye» = ancor, secun li autor es A e R. Angles it es «yet» e Russ «yeshtcho»! Li conjugation del verb «es» es prendet del brochure. Si miscomprensas deveni, to es possibil, proque li letor va consentir, que on ne posse comprender omnicos in un brochure scrit in ti lingue. Li protest contra li monstrat exemple del lingue es van, proque it es prendet litteralmen del brochure. Si li exemple es misguidant, li autor ne devet posir it in su libre, ma vicear it per un altri plu bon. Li sol cosas queles on posse conceder es du printerras («de» por «che», e «bul» por «bu»). Ma mi deve protestar contra expression «inrect presentation» si on monstra li debil flancs. Specialmen interessant it vell esser audir judicies de orientales pri Cosman. Ca ili aproba un tal lingue o prefere un pur european. E. W.

Occidental-Servicie.

Conditiones de participation: secun Cosmoglotta nr 46, pag 51.

Abbreviationes: A angles, D german, Esp Esperanto, F frances, Ho hollandes, I italian, L latin, L. I. lingue international, LsF Latino sine flexione (Interlingua), Occ Occidental, P portugales, R russ, S hispan, Sv sved.

SCHOIKO, Dr. Coelestin, director del education-institut e professor in gymnasie de Stift Melk, Austria; (D, A, F, I, S, Occ, Esp); general correspondentie, anc con persones queles vole misser lor filies por education in nor gymnasie; responde sempre.

HAMMAR, Bengt, cand. med., Bergsgatan 2, Stockholm, Svedia; (Ido, Occ, Sv, D, A, F, S); secun possibilitá da turistic informationes e auxilia turistes in Svedia.

FINK, Peter Heinrich, Burgstr. 60a, Heimbach-Weis, Rhld., Germania; (romanic, germanic, Occ, Ido, LsF); exchange de postcartes illustrat, idées etc; sempre responde.

VOŽENÍLEK, Jaroslav, student, 18 annus; Klejnovská ul. č. 222, Chrudim, Tchechoslovacia; (Occ, Esp, A); Occ-stenografie, exchangea postmarcas, postcartes illustrat.

CASPERS, W., Apartado 1900, Lima, Perú; (Occ, Ido, D, A, F, S, Ho); corresponde pri mundolingue, agricultura tropical, economie, societá, sexualism, nudism etc; da desirat informationes secun possibilitá; ne collecte postmarcas ni postcartes; ne accepta response-cupones.

JEZIERSKI, prof. Dr. Wieslaw de, lector in Universitate, Twardowskiego 82, Krakow 11 (Debniki), Polonia; (A, F, D, Esp, Ido, Occ, LsF etc); corresp. pri solution scientific del problema de L. I.

BYLSMA, Henk, chimico-publicist, Postbus 54, Utrecht, Holland; (Ido, Occ, LsF); corresponde pri folklore, sphragistica, heraldica, naturscientie.

MOESS, Eugen, Grinzinger Allee 7/29, Wien XIX/1, Austria; (Occ); collecte bell postcartes illustrat; da omni informationes pri Austria e Hungaria; corresponde pri interlinguistica e altri temas cultural (anc con damas).

THODOROFF, Angel, officuario, str. general Skobelev 128, Plovdiv, Bulgaria; (Ido, Esp, Occ); corresp. pri problema mudlingual, litteratura, bicyclism, vegetarism.

NAUAVALI, Romesh Chaudra M., C. P. Tank, Road Ram-Bag, Bombay, India; (A, F, Occ); general correspondentie.

Eigentümer, Herausgeber u. Verleger: Gesellschaft Cosmoglotta, Mauer bei Wien, Verantwortlicher Schriftleiter: Ing. E. Pigal, Liesing bei Wien. Druck: Milan Nedvídek, Tábor.